

通而嫡庶名分不可紊亂如或以許通之故有欺侮弱嫡以乖定分者則自朝廷隨聞摘發治罪一依大典還為禁錮為宜令該曹覆啓施行 從之○己未亡命逆賊鄭允福與其子介叱同其姪士元入城隱伏于閭家捕盜大將伺察捕獲鞫問之允福以終始從賊首服遂正刑介叱同士元不服而死許接人金介朴介叱同鄭栢壽亦按鞫皆死杖下發告人金認李文都捕捉人梁嗣立等論賞有差○平安兵使南以興馳啓曰臣自領軍兵一千五百餘名殺向龜城部分諸將各率海西別勝軍湖西自募軍本道精抄軍據險設伏於八嶺車踰嶺綾項嶺等處云○上率王世子及百官行聖節望闕禮於崇政殿○夜白雲一道如氣起自東方直指乾方長竟天坤方有氣如火光○庚申移配仁城君珙於原州仍下教于政院曰放釋仁城之後予以為情法俱行心理稍安今又未能伸予至情徒切痛歎令該道其居處支供等事一依前例各別舉行○宣陵丁字閣正門失火門扉一隻盡燒禮曹請遣堂上郎廳急急奉審一邊設行慰安祭入直叅奉及守護軍等令攸司推考治罪 荅曰依啓叅奉及守護軍拿推○辛酉以延平府院君李貴為判義禁吳蟬為說書○夜坤艮方有氣如火光○壬戌戶曹請設鑄錢廳于仁慶宮○癸亥 上畫講孟子于資政殿○